

MENDRANZES

## L 20% de manco sul Fondo per la mendranzes

La Conferenza de la Mendranzes de la PAT à dat parer a favor sui intervenc per editoria e informazion, la spartijon del Fondo provinzièl per la mendranzes e la convenzion con la RAI

L era la nr 34, la Conferenza per la Mendranzes de la Provincia Autonoma de Trent chiamèda ite en mèrtesc ai 11 de jenè da les 5 domesdi en videoconferenza dal president de la PAT Maurizio Fugatti.


La scontrèda metuda a jir dal Servije mendranzes PAT con sia dirigenta Giuliana Cristoforetti, l è n passaje de obligh pervedù da la legislazion provinzièla su la mendranzes linguistiches, olache duc i rapresentanc istituzionèi de la comunanzes ladina, mochena e cimbra i cogn dèr de obligh l parer sul program di intervenc per l'editoria e la informazion e su la spartijon del Fondo provinzièl per finanzièr ativitèdes e projec de la 3 mendranzes.

A voler sottrissèr l'atenzion de la Provincia per la mendranzes, a la Conferenza à tout pèrt la dirigenta del Departiment afares istituzionèi Valeria Placidi e, per n salut al scomenz, ence l medemo President de la Provincia a chel che, aldò de la LP 6/2008 su la mendranzes ge pervegnissu apontin de presieder chest organism.

La dirigenta Cristoforetti à rejonà del lurier portà inant en colaborazion con la istituzions di teritories per troèr la vida de ge fèr front ai empenes pervedui tegnan cont del smendrament de ressorses, e l à recordà la scomenzadives portèdes inant a nivel provinzièl, desche l Manual de educazion zivica en colaborazion con l'Università de Trent, l'enrescida soziolinguistica col didament de etres departimenc, l liber dedicà a la trei comunanzes de mendranza de la provinzia tel chèder del projet «Gli italiani dell'altrove» e amò la scontrèdes «Dialoghi con le minoranze» e l convegn ECCA su la Chèrta europeèna di deric de la mendranzes, endrezà dal Comun General col Istitut Cultural Ladin.

### L gran sparagn de la convenzion con la RAI

Per l'an 2022 la desponibilità de ressorses en dut sul Fondo de la mendranzes la é de 738.850 euro



La sentèda online de la 34<sup>a</sup> Conferenza per la Mendranzes de la Provincia de Trent.

respet ai 915.988 del 2021, l 20% de manco. Cristoforetti à deschiari che la desferenza vegn dal smendrament de 177.000 euro del stanziament per la convenzion con la RAI de Busan per la trasmiscions del terzo canal bis (103) per todesch e ladin, convenzion che l è pervedù che la se sere su ai 14 de firè, canche sarà l switch off e col nef sistem digital duc chisc programes de la RAI sarà da poder veder dut un. Al post de chest – à dit la dirigenta – vardon se l è l met de fèr ruèr sun dut l tegnir de la provinzia la trasmiscions del canal austriach ORF.

Semper per chel che vèrda l setor televisif, la Conferenza à cognù dèr l parer a favor per sperlongèr la convenzion co la RAI enscin canche sarà chest passaje e l dirigent generèl de l'Unità de mision strategica PAT per l'inovazion te la telecomunicazioni Paolo Simonetti à deschiari che ades l panoram é mudà e a se caparèr i deric de la frequenzes per l servije televisif digitèl per l Trentin, dant te man de emittentes locales, l é stat El Towers de Mediaset, e che

ge volarà veder co fèr a veicolèr al miec sun dut l tegnir i contegnui, tant per chel che vèrda la ORF che i prodoc locai, ence chi de la comunanzes de mendranza che jia fora sun TML, vardan de tor ite ence i enc locai.

Ampò – à sottrissà Simonetti – gé peisse che l davegnir no sarà de la television, ajache al post de chesta ciaparà semper maor emportanza la web tv, donca sarà semper più de utol che i investimenc i vae de chel vers.

### Detomas »sindacalista de la mendranzes«

L prum intervent l é stat chel del Procurador de Fascia Giuseppe Detomas, che l à uzà fora la costion de la dificoltà, vegnuda fora te la Consulta Ladina del Comun General, de cogner enjignèr l Pian Organich dant de saer coluna che sarà la desponibilità de ressorses da man de la Provincia. Chest Pian l é n document fontamentèl, che serf a coordènèr la ativitèdes de duta la

istituzions de la val che se cruzia de cultura ladina – l à dit – e se cognessa valutèr de mudèr tempes o prozedures per poder l fèr canche se sà avisa cotant che la PAT podarà meter a la leta, per no cogner do l ciapèr te man endodanef e l mudèr.

En cont de chest duc i intervenc, tant da man di esponenc de la comunanzes cimbra e mochena che de la medema dirigenta del Servije mendranzes, à confermà chest besegn e l'intenzion de proèr a troèr na vida desferenta.

Detomas à rejonà ence del gran smendrament del Fondo, dijan che l se aea alarmà tel veder n tai del 20% respet al an dant. Se na atività o na scomenzadiva de speisa no la é più – l à dit en sostanza – chest no vel dir che se cogne tor tor demez chela soma; no se cogn sparagnèr su la mendranzes ma se cognessa veder olache l é più de utol che chi scioldi vegne durè, ajache i besegnes per la comunanzes de mendranza no i mencia. Ence i ejic del dombrament – l à jontà – i podarà ne dèr l

chèder de la situazion de la mendranzes e ne didèr a capir olache l é più besegn e maor utol entervegnir.

Detomas à amò rebadi più outes l besegn che vegne arsegurà la atenzion a la comunanzes linguistiches da man de la Provincia e, se dijan enstes »sindacalista de la mendranzes«, l à leà a chest ence sie parer favorevol pervedù per l pian de l'informazion, per la spartijon del Fondo e per la convenzion con la Rai.

### I intervenc de Mussner e Brunel

A la Conferenza tol pèrt de derit ence i presidenc de l'Union Generela di Ladins dla Dolomites e de l'Union di Ladins de Fascia. La presidenta Milva Mussner à recordà la scontrèda domanèda coi funzionaries del Servije mendranzes per troèr la vida de ge arsegurèr a La Usc di Ladins dal 2023 inant na soluzion de finanziament più chièra e percacenta e l'à reingrazià per la desponibolità a endrezèr la scontrèda te tempes curc. L president Fernando Brunel à recordà l empen de l'Union per La Usc e per n muie de etres projec e ativitèdes per l lengaz ladin. L é na endesfida semper più senestra – l à dit – e de chest ence la Provincia cogn tegnir cont, e no desmentier mai che la mendranzes l é l fondament de l'autonomia trentina, perveduda dal Statut.

### La aproazioni

I trei pareres obligatories jà recordé i à abù resposta positiva da man de duc i componenc de la Conferenza: anter l auter tel Pian de l'informazion l é pervedù da man de la Provincia 99.400 euro al Comun General per la produzion televisives o video per ladin, 132.000 euro per La Usc di Ladins (66.600 a l'Union di Ladins de Fascia travers l CGF per speises per la redazion de val e etres 65.400 diretamente a l'Union Generela) e 24.000 per programes radio per ladin.

Lucia Gross